

ГЎЗАЛ БЕГИМ

СУКУНАТ ЖАРАНГЛАРИ

Тошкент
«Ёзувчи» нашриёти
1998

Миллий қадриятларни тараннум этиб, ўсиб келаётган ёш авлодда ватанпарварлик ва фидойилик туйгусини янада кучайтириб, истиқлолни ва порлок келажагимизни шарафлаш ниятида ёзилган ушбу китоб Ўзбекистон мустақиллигининг 7 йиллигига бағишланган бўлиб, у Республика Давлат матбуот қўмитаси ташаббуси билан ижарадаги Тошкент матбаа комбинати ҳомийлигига чоп этилди.

Гўзал Бегим шеърият ихлосмандлари қалбига янги сўз, янгича тафаккур олиб кираётган шоирлар қаторига киради. Ушбу шеърларни ўқиб Сиз хаяжонланасиз, ундаги образлар балки ўзингизда борлигини пайқамаган кечинмаларингизни юзага чиқаради, шоира шеърларидан кўнглингизга гўзал шарпалар қўчиб ўтади.

Гўзал Бегимнинг илк тўпламини Сизга тақдим этар эканмиз, Сизнинг шеърга чанқоқ кўнглингиз ушбу шеърларни муносиб баҳолайди, деб умид қиласиз.

ГЎЗАЛ БЕГИМ - 1974 йили Хоразм вилоятининг Қушкўлир туманидаги Ўзбек қишлоғида туғилган. 1997 йилда ТошДУнинг ўзбек филологияси факультетини тамомлаган. Шеърлари Республика матбуотида чоп этилган Ҳозирги кунда Ресспублика радиоси Адабиёт мухарририятида хизмат қилмоқда.

СЎЗ ИФОРИ

Анъанавий шеъриятга кўниккан назм муҳлиси учун миллий адабиётимиз ичida ранг талашаётган модерн шеърияти ғайритабии туюлиши аниқ. Бироқ ҳозирги замон Ғарб шеъриятидан боҳбар шеърхон бу борада ҳеч таажжубланмайди. Сабаби шундаки, биз янги санаётган тўлқинлар аллақачон Ғарбда эскириб, бошқа оқимлар орасида билинмайдиган даражага етган. Хўш, модерн шеъриятининг янгилиги нимада ўзи? Бу янгилик модерн шеъриятининг фақатгина инсон шуурига таяниши билан изоҳланади. Модерн шеър ўқувчи онгига муайян маъно ташимайди, унинг кайфиятига турли тарафлардан таъсир ўтказади, холос. Демак, модерн шеърияти қонун-қоидалари «Шоир нима демоқчи», «Ғалати-ку бу?» қабилидаги саволларга ўрин қолдирмайди, зотан, модернизмнинг моҳиятида ўша «ғалатилик» бор.

Ёш шоира Гўзал Бегим шеърлари ана шу жиҳатдан ўзини оқлади. Шоира рух кенгликлариға ўзича сайр қиласи, нималарни дир излайди, топмоқчи бўлади. Бу интилишлар ажабтовур эмас, бизга таниш, жудаям таниш, аммо ўша танишлик сезгиси идрокимиздан узоқларда жимиirlайди. Энг муҳими шоира СўЗни аниқ бир кайфиятга монанд тарзда ишлата билган, шууримиз завқу шавқини таъминлаш даражасида қалам тебратган. Ўзбек модерн шеърияти ривожига ҳисса қўшишга чоғланган шоирага омад тилаймиз.

Баҳром РЎЗИМУҲАММАД

МЕН БАХОРНИ КУТДИМ

Мен баҳорни кутдим йигирма бир йил,
Ўлмасдан тирилиб етишдим унга.
Юзимни бекитдим япроқлар билан,
Таяммум айладим тупроқлар билан.
Мен баҳорни кутдим.

Мен фасл истадим музайян, дилбар,
Сарварлар лаб босди бармоқларимга.
Баҳордан бурунроқ тўкилай дедим,
Чидолмай аёзнинг тирноқларига.
Мен фасл истадим.

Мен нафас қўмсадим, хушбўй — атирсиз,
Тонгда юзин чайиб чиққан саломга.
Юрагим қатига тиз чўккан ҳаё
Айланиб кетажак битта каломга.
Мен нафас қўмсадим.

Мен байрамлар кутдим, тақвим кўрмаган,
Бир боқищдек топ-тоза ғуур.
Мен шаҳзодлар кутдим, дилдор кўрмаган,
Эшик тирқишидан таралган танбур.
Мен байрамлар кутдим.

Мен ҳайитлар кутдим, илҳақ, интизор,
Бош қўйиб Қадрнинг илкларига.
Бир кун қайтажакман ёруғ оламга
Осилиб баҳорнинг киприкларига.
Мен ҳайитлар кутдим.

* * *

Мен оғзимдан гуллаб қуйдим
Ўриклардан бир лаҳза олдин.
Нафис гулда ҳасад уйғотдим,
Юрагимга муҳрини отдим.

Кўзларимдан сув ичган гуллар
Ифор тарар солиҳ дилларга.
Куним, умрим ўтар сув қуйиб
Оғзимда очилган гулларга.

* * *

Мен мунгман
Хеч кимнинг қўзига чўкмаган,
Хадсиз макрман
Хеч кимнинг қўйнига кирмаган.

Мен хазонман
Ҳали супирилмаган.
Киёфасиз сувратман
Чизиш ҳақда ўй сурilmagan.

* * *

Бошим тошга текканда,
сени қайғурдим, ғарип тош.
Аlam қилмайдими сенга
муштдеккина бошдан мушт еганинг,
сенинг йиғлагинг келмайдими,
мен сенинг ҳолингга йиғляяпман, тош.

* * *

Кўз очиб кўрганим — сизсиз,
кўзим юмиб кўрганим ҳам — сиз.
Кўз очиб кўрганим бисотингизда
тун қўйнига кирмаган виждон.
Тонгдек намчил хаёл,
биллурдайин қалб,
кўзим очиб кўрганим сайин
кўргим келар қалбимни очиб.

ТИЛСИМ

Менга сирли кўзгунгни бер, энажон,
Тароғинг-ла сочимни ўр, энажон,
Кўнгил эса мўъжиза дер, энажон,
Бағрингни инъом эт, Тилсим.

Мўъжиза рўй бериб, наҳанг, ют мени,
Ички хазинангдан огоҳ эт мени,
Зўр бўлсанг, ғам-андух, шунда тут мени
Баҳт гулин тухфа эт, Тилсим.

Дев оға, елкангга ола қол мени,
Париларга ҳамроҳ қила қол мени,
Кафtingда сирли гул қила қол мени,

Бағрингни инъом эт, Тилсим.

Тилсим юрагимни, майлига, тилсин,
Сочларимдан унга дарича илсин,
Лаҳзалик баҳтдан бир масрур қилин
Тилсим,
Тилсим.

* * *

Мен умримни юриб ўтказяпман
овулма-овул,
кентма-кент,
элма-эл
сүраб Маккани топадигандай
ошиқаман узун манзилга.

Мен ўтар эканман,
бегона юраклар сўроққа тутар
ва дахлсиз қўллар
бўшлиқни силайди.

Одимлар эканман устимдан
қуийлади сариқ жисмлар,
ёйилади сариқ товушлар

Ва ниҳоят
тўхтаб қоламан
сүраб суриштирилган
Маккага етмай...

* * *

Мен деразадан баҳтни кузатяпман,
бошимга кўтаргим келару,
афсус...

Мен деразадан баҳтни кузатяпман,
туғилиб қарамаган баҳтни,
кулиб қарамаган баҳтни...

* * *

Узилган япроқда узайди умрим,
мен яшай бошладим

жами титроқларни
ва жами жимликни юракка жамлаб.

Мен яшай бошладим
умиднинг
зангори кўксига бир қадам босиб,
тупроқнинг кўзлари ўйилди шунда
менинг ўйлаб босган қадамларимдан

ФАРИШТАСИЗ КУНЛАР

1

Фаришта, Мен сени кутаман,
ердан келишингни, осмондан эмас.
Қадам товушингни кўзимга босиб
асрашга интиламан
учишга чоғланган
ўнг қабогимни.

2

Нурдан ясалгансан. Кўзим нуридек
йилтиллайди қиёфанд сенинг.
Кенглилла қулоч ёяркансан,
осилиб қоласан
киприкларимга,
осилиб қоласан абадий.

3

Фаришта, Сени кутдим улкан шаҳарда
ва ўша ярқироқ қўлларинг билан
бошимни муттасил силамоғингни
истадим,
айландим бокира қизга.
Энди мен енгилман, жудаям енгил,
эшик тирқишида қолган ҳаводек.

4

Кўзим ёғдулари ерга қуларкан,
бир ҳовуч сув каби сачраб кетарлар.
ўшал томчиларга сингади секин
қип-қизил япроқ.

5

Фаришта, энди мен тирик эмасман,
Сен эса қимирлаган жасадга боқиб
үйладинг ушбу жимлик қаърида
товушдан яралган
товуш борлигин.

Кафtingда бир сиким кул
ва тилай бошладинг
бу дунёда йўқ бир инсонни.
Жасадга шивирлаб қўйдинг барибир,
шивирладинг о-ҳис-таа.

ТУНГИ МАКТУБЛАР

«Мен сени истадим, сен - мактубимни...»
Мактубдан

1

Тун.
Шахар узра ёнган чироқлар
менинг юрагимни ёритса эди,
ўтирмасдим дийдираб зулмат қаърида.
Изтироб ипидан арқонлар эшиб,
эшилган арқондан бир йўл ясарман,
бир йўлки, юришар фақат гумроҳлар,
Қувониб қўйишар гумроҳлигидан.

2

Менга умр бергин, эй Дараҳт,
сен қадимиjsан, қадимиj,
кўнолға қуарман япроқларингга,
ифорингга шакл ясарман,
шитирлаб қўяман сен учун,
уйғониб кетасан минг йиллик дардан
ва кўксингга қўярсан илиб
осойишта шарпаларимни.

3

Руҳимни тутқаздим қўлингга,
сичқонлар кемирган руҳимни.
Кулча деб ўйлашганми,
кемиришибди-ку,
руҳим атрофида ётар сочилиб
тиш синиклари.

Қабул эт,
кўзингта кетайин сингиб,
чўмилиб яшайин унда бир умр,
қоп-қора кунларга кетай қўнишиб.
«Бу дунё қўнишдан иборатдир» деб
ёзгил пешонамга кўм-кўк сиёҳда,
бўртиб турсин битиклар томирим каби,
кўзларингни очма,
соҳибим,
унда мен адашиб қоламан,
шундай топаман мен
хаёлнинг поёнсиз сарҳадларини.

* * *

Тушиб улгуради кўзларимиздан
бир сиқим тупроққа
осмон сояси.

Жинлар чалган тешик жомлардан
кўримсиз товуш тўкилади,
ҳаммамиз тупроқни унутиб қўйиб,
ўйнаймиз жинларнинг ногорасига.

Тирноғимиз остида эса
шайтон болалари
судраг ғилдирак.

* * *

Киприкларимни
йиғлаб-йиғлаб овутгим келади
ва кўршапалакни уйғотаман
кўзимга босиб,

барвакт кетгим келар фанодан
сенинг хаёлингга осилиб.

* * *

Тунда сизни чўчитган
Менинг соchlаримнинг шивири бўлса

Күнгириңдай жарангласа
Сочларим ши-ви-ри
Сизнинг жимжит юрагингизда.

СИНГАН ФИКР ЧИЗГИЛАРИ

1

Денгиз ҳақидаги фикрим
охистагина ниҳоясига етди,
иккиланди хаёлимдаги ҳаракат,
тўлиша бошладим тўлқинга боқиб,
тўлқинландим тўлқин ичида,
унутдим ёзмаслик изтиробини.
Дарс тинглай бошладим борлиқдан,
англадим ўзимнинг мавжудлигимни,
жим тилар бошладим ўша борлиқдан
бир истакларки эл қатори,
фақат ғайриоддий биргина тилак
ўйладим,
уни-да узиб ташлади
кўзимдаги учқур ҳаракат.

2

Мен юрак ҳовучлаб яшайман
эсимни еб қўймаслик учун,
жаҳлимни қўзгайман гоҳи-гоҳида
ўчоқдаги кулни титгандек.
Бир ҳовуч ненидир сепиб юбордим,
қип-қизил дунёга айланди борлиқ,
ҳайтовур эсим жойида,
еб тугатдим ўзимни фақат...

3

Сени ўйладим,
роҳатландим тош маъбуд каби
сен ҳақдаги совуқ ўйимдан.
Барибир чарх урдинг,
чархладинг мени,
кўзим олдидаги ўтмас оламдан
олиб ўтдинг
ёш аёл қилиб
тошдан улгу олган жисмимни.

* * *

Сахарда
тонг адөғига етмай
айнан шу эшикнинг
ғийқиллаган товуши
ҳаловатим
бузгунга
қадар

ўша қалин товуш
жаранглаган сас
мудроқ туйғуларга урилгунича

ғудраниб яшадим
уммон ва томчи оралиғида
қалтираган бир товуш бўлиб

сукунат эса
оппоқ унсурлардан
raig олган эди

* * *

Кўзларимни юмсам
яйраб кетар
бир шода қайғу
ҳали ерга тўкилмаган
мен излаган нур

Кўзларимни юмсам
бирлашиб кетади иккита дунё
кундуз юмалоқ шаклга киради
ва шарпалардан
яралади улкан мавжудлик
капалакнинг енгил қаноти
елларни уйғотиб қўяди аста

Кўзларимни юмарканман
қароқларимни берклигича кўргим келади
ушбу қасрни ардоқлайман
чунки сен борсан

* * *

Кўзларингни ўқиб чарчамас кўзим

менга күч беради
ундаги жило

бир чимдим бер изтиробингдан
сен каби қийналай
сен каби

ориятли тиланчи бўлиб
ийманиб чертаман
юрак қопқасин

қироат қиласман исмингни
олис оқшомларда
сокин оқшомларда

кўзларингни ўқийман
сиirlар денгизига
шўнғийман аста-а-а

ТАСАВВУФ ВА ТАСАВВУР

Юз бурдим
дараҳтзор бир қалтиради
заяфарон боғлардан
изладим
хазон
азон айтаверди минг бир йўлимда
яшил тортиб сарғайган рухим.

Соямни қўмсадим
қоқилиб кетдим
бир ҳовуч нур тушди
соям остига
шу нурдан ясадим
кафт каби оқлик
бўғзимга етди сўнг
узилган шу япроқ
кўм-кўк жудолик.

Юз бурдим
дараҳтлар сабоқ беришди
соchlарим минг тола
барчаси нола
томиримда қондек айланар
қаҳқаҳага айланган кулфат
уйғонар дафъатан ғам салтанатин
ҳаловатга чўмган маликалари

бошимдан йрғитдим бошсиз кунларни
тасаввур ўргилди бор бисотимдан
кўксимда ўсган гул уруғи Борлик.

ЯЛТИРОҚ ТАСВИР

Тун бўйи
тун бўйи-и йигладим
ёғиб чарчамаган ёмғир мисоли
кўзларимга суртдим заминни
суртдим пешонамга
юракларимга

кўзларим сўйлаган ривоят
йўқотиб боради шаклини
кўксим қафасини очдим
совуқда яхлатдим
юракларима-а-ай

тун бўйи
осмонга
чиқиб йигладим
нарвон ясада чиқдим
қотиб улгурмаган
суякларимдан

* * *

Хоргин нигоҳ билан
нени-да тушунтириб бўларди
англатиб бўларди нени ҳам

аммо кўп нарсани
сўйлаши мумкин
гапирмай толиққан кўзлар
оқшом чоғ

мен сизни
тинимсиз кўраман
юрагимга термулиб

ойга чиққан каби
завқланиб кетаман
юрақда акс этган
сиймони кўрсам

* * *

Капалак сен қадар
бахтли бўлсайдим
сўзларнинг тотини олиб яшасам
сўзнинг ёноғига қўнолға қуриб
асрасам
қанотимнинг соясида ўз гулзоримни

* * *

Бу фикрни кўплар
ушлаб кўрдилар
елка учиринди
ва се-е-екин-гина
учиб кетди бор-йўқ елкалар

фикр эса тошдек қотиб турибди

* * *

Вужудимдан ясалган тобут
кезиб юрар замин қаърида
бир қуни тобутдан чиқишим тайин
сўнг англаб етарман
ўликлар сафига бегоналигим
менга мухтоҷлигин
куёшли замин

* * *

Сен жимсан
мен жимман
кўзимиизда сиргалади
учқур изтироб
ўша жимлйк орасида оғир бир тош бор
юрак ва ақлнинг мувозанати

* * *

«Вақт севги олдида тўхтайди фақат»
Имант Зиедонис

Пиёланинг учган лабига
мухрланар ўтмай қолган вақт
кўтарилиб туради ундан
ўтмаётган вақтнинг ховури
пешонамга танғиб қўяман
вақтнинг товушин

япроқлар титрайди тун бўйи
япроқларим менинг
тип-тиниқ жимлик
қалтирашиб туради улар
мангуга осилиб қолишдан чўчиб

юрагимда ёзилмаган қоғоз парчасин
титкилайди синикқан ранглар
лабларимиз қўмсар бир умр
пиёланинг учган лабини

* * *

Ичимга тушган дамимдан
кўғирчоқ ясайман
йилларки ўйнайман шу қўғирчоқни

СУКУНАТ ЖАРАНГЛАРИ

Рухимда ўрмалар бир тўп чумоли
шивирлайман
«мен чумолиман»
мен тасдиги туғилади
юрагимнинг бир томирига
илакишиб турар оғир товуш
МЕН

Қиров босган ҳаракатимни
чўқилайди тарих кўрган қуш
қушга айланаман ва секингина
қанотларим яйраб кетади
сенинг мактубингни кўтариб
осмонга учмасдан
ерга қўнмасдан
айланиб яшайман бошинг устида

Олис минтақада
сукунат жаранглайди
барг тўқади номаълум дараҳт

исмсиз чақирамиз бир-бirimizni
ва топиб оламан исмингни
хәёлимнинг паралел чизикларидан

Мен кечиб бораман
танимайди вақт
ўтдаги қурт каби азобланаман
руҳимга тирмаша бошлайман
енгиб ўтаман
бу дунёда енгиш керак бўлган
ҳамма нарсани
«Кутгил, келади» деб
юпатмайман ортиқ ўзимни
гуллар додласалар
тишимни тишимга босиб яшайман
сукунатнинг ҳиди келади
сенга атаганим ҳар бир кунимдан

ИРОДА ТАХЛАМЛАРИ

Ёмғир ёққач
кўкаргани каби гул-гиёҳ
озиқланганидай жами ҳашарот
кўнгил дарвозасин чертди
том-

чи-

лаа-

а-

р

«Жон ўлмасдир —
тан фоний»
йўналтираман ўзимни
миямдаги мажҳул фикрга

Тилимнинг суягин тутганча
майсаларнинг қулоғига пи chirлайман
Менга кенглик беринг заминий кенглик
кулоқларимни тинч қўйинглар
оёқларимга хукм ўқиманг
юрагимни ғижимламанг
керак бу жисмлар менга ҳам

Ўлимданда
қўрқинчлироқ сўз қидираман
жумла ахтараман
ҳаловатимга зарба бергувчи
миямдан бурқсиётган тутунда

учоқларнинг изи қолади
юр паноҳ излаймиз ўша излардан

* * *

Ёмғир ёғди бугун
ташқарини томоша қилиб
зериқмасдан ўтириш мумкин
димофимга намчил ҳаво урилди
Дараҳтга айлангим келди шу кезда
муттасил ювингим келди ёмғирда
Ҳеч бўлмаса майда томчи бўлиб
ерга синггим келди-ки бирам
Эртага қор ёғса
Мен ҳам йиғиштираман
ёмғирга аталган муҳаббатимни

Бугун эса
ёмғир ёғди
ер ҳиди таралди теграмга

УРҒУЛИ БЎГИНЛАР

Талаффуз қиларканман
қишлоқ сўзини
урғу олар икки бўгин ҳам

* * *

Сен Мен У
моҳият излаймиз бир-биримиздан

* * *

Ёлғизман дейман-у
қувониб қўяман
курилласа бақалар агар

* * *

Игна тутмаган хонимнинг
бармоқлари
игнадан ўткир.

* * *

Томчиларга урилиб
парча-парча бўлиб кетаман
ва ёға бошлайман

* * *

Юрагимнинг ярми тўқлик
ярми очлик
ярми шўхлик, ярми жимлик
қачон бўлар унда бир бутунлик

* * *

Мен тунда дарахтга суяниб китоб ўқиши яхши кўраман. Дарахт эса менга суянишни истайди. Дарахт босинқираб чўчишиб қўяди баъзан. Куртаклари чумолидек ўрмалайди. Хаёлимни узолмайман шохчалардан. Сийқаси чиққан жимликни тинглайман. Дарахтга суянаман барибир. Ҳар кимнинг ҳам суянчиғи бўлиши керак-да ҳаётда.

* * *

Қиши. Мен унга ўчакишигим келади.

Мен унинг кўзига дунёдаги энг ўжар, энг шаккок қиз бўлиб кўрингим келади.

Ўзимни англатиш учун қишининг совуқ кифтларига юзимни ишқайман. Лабларимда эриб бошлади қиши. Ажабо, қиши менинг оғзимдан қаҳри қайтган одамдек эриб чиқмоқда. Оғзимдан қиши тўкилмоқда. Бироқ, танамда қаттиқ титроқ бошланади. Ахир мен қайсар қишини ҳазм қилипман-да.

* * *

Менинг ҳаётга қадамим ҳар тонг деразадан бошланади.

Мен илк нигоҳимни «ухлаб қолмадимми?» деган ҳадик билан деразага ташлайман ва илк қадамимни дераза тарафга отаман.

Коронфиликни сидираман пардан ушлаётиб.

Деразадан оқариб кўринган тонг-кўзим олдидағи илк қиёфа.

Деразадан бошланган ҳаёт менинг кундалиқ насибамдир.

ОЙГА БОРАР ЙЎЛ

Яrim тун. Кўзларим толиққан. Кўзларим ҳайдаяпти уйқуни: яшаш мумкин эканлигини ҳис қилдим. Атрофим тўла, керак ва кераксиз нарсалар. Юрагимни тинглайман. Овозиз шовқин. Фалати. Ўша шовқин ичига сингиб кетаман. Баҳайбат жимликка кўшиламан. Эшик. Тутқич. Таниш ва нотаниш қўлларнинг ҳидидан чарчаган. Чиқиб кетаман. Менинг янги йўлум бошланади. Ойга борар йўл. Бу йўлда тинимсиз йўргалайман. Арзанда қизига айланаман ойнинг. Ойга юрак очиш мумкин. Айниқса изтиробга тўлган бир юрак бўлса. Ой тунни ёритган

каби рухимга тушади, орзиқтиради рухимни. Ойда бедорлар учрашади. Тунда хоҳлаганча яшаш мумкин. Одамлар уйқуга кетгач озод ва хурсанд яшаса бўлади, чунки ҳаракатларингни, туйғуларингни тартибга чақиравчилар йўқ. Тун интизомсиз ибтидоланиб, имтиҳонсиз интиҳо топади. Кундуз ўз ҳимоячиларига хордик чиқариш имконини берди, тун эса чексизлик. Тараддуд. Бир хиллик пардасининг йиртилиши. Бедорлик ҳаловати. Уйғоқ сўқмоқлар бирлашади. Уйқуси ўчиб кетган ёстиқ. Ёстиқ остида ўқилмаган китоблар. Тунда мен ўз манзилимга адашмай етиб оламан. Мен яна ўз йўлимни топиб олдим.

Салом, йўлим, ойга элтадиган ёруғ йўл.

* * *

Тун менинг севгим
овозини ютиб юборган
жисмсиз юрибди қўчада
ғудраниб
қўяман ўзимга ўзим
тун менинг севгим
ундан хайикади
фасллар
еллар
одамлар
севгимнинг қанотлари кесик
оёғи йўқ
битта юрак билан шунчалар ғолиб
менинг севгим

* * *

Эй яратувчим,
Қарғама бизни.
Номинг-ла қасам ичавериб
Безовта қилмадикми ҳадеб букилиб.

Эй қадрли осмон,
афу эт бизни
Қўйдик сенга кўпроқ тикилиб.

Эй тоғлар
суяйверманг бизни
ўрганайлик бир бор йиқилиб.

* * *

Авайлаб
авайлаб

сингиб кетдингиз
күзимнинг оқ ҳамда қораларига
дараҳтларга монанд кипригим
бир маромда силкиниб турар

Қорачиғимни күз ёшлар тирнайди
вазифасини унutar юрак
кафтим
фақат кафтим
шархлаб турар чизикларини